

L'urs JJ3 sco retg dals animals da rapina

Exposiziun d'animals da rapina en il Museum da la natira a Cuira

■ (mc) L'urs brin JJ3 che è vegnì sajettà la primavaira passa da per motivs da segirtad è renaschì sco preparat. El stat en il center da l'exposiziun davart ils animals da rapina che ha lieu actualmain en il Museum da la natira a Cuira. Sco quai ch'il directur dal Museum da la natira *Jürg Paul Müller* ha declerà ier a l'avertura da l'exposiziun permanenta vivevan 11 spezia d'animals da rapina anc el 19avel tschentaner en las muntognas grischunas. Luf, luf tscharver, ludra ed urs èn vegnids ragischads or. Actualmain dattia i dentant indezis che quels animals da rapina conquistian puspè ils territoris en las Alps grischunas.

L'urs problematic

La liquidaziun da l'urs problematic JJ3 che è vegnida ordinada dals organs da chatscha dal Grischun e che è vegnida exequida ils 14 d'avrigl 2008 ha chaschunà grondas discussiuns en las medias da la Svizra e da l'exteriur, ha declerà *Georg Brosi*, il schef da l'Uffizi chantunal da chatscha e pestga. L'urs JJ3 saja oriund dal Trentino e saja sa mess sin viadi per ina excursiun en il Grischun. Quà è el dà en egl fitg spert pervi da ses cumportament senza tema, en spezial pervi da sia vischinanza als umans. L'urs saja entrà sistematicain en ils vitgs per encurir nutriment. Quest cumportament te-

merari ha la finala sigillà ses destin. L'urs saja daventà in ristg per l'uman ed haja uschia stuì vegnir eliminà. JJ3 ha uschia gù il medem destin sco ses frar JJ1 alias Bruno che è vegnì sajettà l'onn 2006 en Baviera. In ulteriur frar, JJ2 numnà Lumpaz è stà la stad 2005 l'emprim urs sin intschess grischun suenter sia extirpaziun avant 100 onns. El è anc adina sparì. Durant che JJ3 è stà en il Grischun ha in ulteriur mez frar JJ4 visità la Val Müstair per alura puspè turnar enavos en il Trentino. Damai che la populaziun d'urs en il Trentino crescha, n'exclauda *Georg Brosi* betg che ulteriurs urs vegnian proximamain vers il Grischun. L'onn 2008 han las trais ursas numnadamain parturì en tut 8 ursets e per 2009 en pliras ursas purtantas. Ins veglia impedir che ils urs vegnian en la vischinanza dals abitadis per tschertgar vivonda. Per quel motiv haja la Biosfera Val Müstair laschà elavurar in project che propona mesiras per allontanar ils rumants uschia ch'els carmalan betg ils urs. Sco quai che *Georg Brosi* constatescha vegnia il spazi da viver da la gronda part dals animals da rapina oz cultivà dals umans a moda intensiva. Adina dapli abitadis, dapli vias da traffic e dapli turissem limiteschian il spazi da viver dals animals da rapina e chaschunian magari conflicts che stoppian vegnir schliads

Da la mustaila fin l'urs

L'exposiziun creada da *Carmen Gasser* e *Remo Derungs* en collavuraziun cun *Alessandra Baggiani* documentescha ils destins differents dals animals da rapina indigens. Entant che la vulp, la fiergna alva ed il tais survivan er en cuntradas cultivadas, èn urs, lufs e lufs tscharvers stads extirpads. Er il dumber da fiergnas melnas che prefereschan guauds perifers sa reducescha. Betg pli chatschads vegnan mustailas cuminas ed er melins. Entant che la ludra è preschenta en quasi tut ils pajais europeics mancan cumprovas da sia existenza en il Grischun.

La nova exposiziun en il Museum da la natira mussa ils animals cun il respect duì. Il temp nua che lufs ed urs vegniván exponids cun lur dents da stgarpar e cun tschattas auzadas è passà, ha ditg *Jürg Paul Müller* ed aschuntà: «Ma nus na preschentan era betg ils animals da rapina sco ursets e sco lufs da carsinar.»

Ils animals da rapina han blers tratgs cuminaivels. Els vivan per gronda part da charrn d'auters animals ch'els persequiteschan sco chatschaders cun organs sensitiv bain svilupads. Malgrà che ils animals da rapina han tuts ils medems perdavants e lur grondezza fetg differenta. Ha la mustaila cumina ina paisa da 30 fin 50 grams è l'urs creschì radund 10 000 giadas pli grev.



L'urs JJ3 exponì en il Museum da la natira a Cuira è vegnì preparà dad *Ulrich E. Schnepf*.

FOTO: M. CABALZAR